

FIESKOM 2015 UTHM Diharap Lahirkan Graduan Holistik

JOHOR BAHRU, 22 Dis (Bernama) -- Fiesta Kokurikulum Mahasiswa (FIESKOM) 2015 yang dianjurkan di Universiti Tun Hussein Onn Malaysia (UTHM), Batu Pahat, baru-baru ini, diharapkan dapat melahirkan graduan holistik serta yang cintakan perpaduan.

Ketua Jabatan Kesukarelawanan Pusat Kokurikulum UTHM Dr Mohd Khir Mohd Nor berkata program itu merupakan aktiviti kokurikulum bersepadu yang menggabungkan kesemua teras kokurikulum di universiti itu.

"Penganjuran program seumpama ini adalah contoh terbaik, dan ia adalah usaha untuk membangunkan jati diri mahasiswa yang seimbang, holistik dan berciri keusahawanan serta memahami kepentingan perpaduan bangsa dalam kalangan generasi muda," kata beliau menerusi satu kenyataan, di sini Selasa.

Beliau berkata segala perancangan dan pengurusan FIESKOM 2015 ini dilaksanakan sepenuhnya oleh pelajar-pelajar Kursus Kokurikulum Berkredit (KKB) Pusat Kokurikulum UTHM dengan pemantauan staf dan pengajar Pusat Kokurikulum UTHM.

Berprinsipkan "Dari Pelajar kepada Pelajar untuk Pelajar", penganjuran kali ini memberi tumpuan kepada pembangunan kemahiran insaniah (KI) mahasiswa UTHM yang majoritinya dari bidang teknikal dan kejuruteraan, katanya.

Mohd Khir berkata penganjuran FIESKOM juga turut memfokuskan aspirasi perpaduan bangsa yang cuba direalisasikan dalam setiap aktiviti bagi membina semangat patriotik dan perpaduan di kalangan mahasiswa.

Program ini bukan sahaja telah berjaya menarik penglibatan pelajar UTHM malah memberi peluang kepada komuniti sekitar UTHM termasuk penduduk orang asli dari Kampung Sejangong, Sri Medan, Batu Pahat, untuk sama-sama turut serta, katanya.

Lebih 20 aktiviti pelajar telah dijalankan sepanjang program itu yang bermula 4 hingga 17 Disember lalu termasuk Pertandingan Kawad Kaki Badan Beruniform UTHM, Klinik Tenpin, Klinik Golf dan sebagainya.

Turut diadakan pelancaran buku "Citra Kokurikulum" hasil karya staf Pusat Kokurikulum UTHM, yang diolah berdasarkan integrasi penulisan akademik dan naratif kisah benar yang telah dilalui dan dirasai mereka.